

DOMENIE XIII «VIE PAL AN»

Antifone di jentrade Sal 46,2

Batêt lis mans, popui de tiere,
scriulant al Signôr in ligrie.

Colete

Diu, che midiant de tô gracie
tu âs volût che o diventassin fis de lûs,
danus par plasê di no jessi invuluçâts dal scûr de falsetât
ma di restâ simpri lusorôs cul sflandôr de veretât.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 1 Re 19,16.19-21

Liseu si cjapà sù e i lè daûrji a Elie.

Dal prin libri dai Rês

In chei dîs, il Signôr i disè a Elie: «Tu onzarâs Liseu, fi di Safat, di Abêl-Mecole, come profete impen di te.

Elie al partì di li e si intivà in Liseu, fi di Safat, che al stave arant cun dodis pârs di bûs e lui al jere daprûf dal dodicesim. Elie al passà dongje di lui e i butà intor la sô manteline. Liseu al implantà i bûs, i corè daûrji a Elie e i disè: «Lassimi dâur une bussade a gno pari e a mê mari e po dopo o vignarai daûrti». Elie i rispuindè: «Va e torne; tu sâs benon ce che o ài fat di te». Liseu lu lassà, al cjapà un pâ di bûs e ju sacrificà. Al doprà i lôr furniments par fâju rustî e ju esibì ai siei oms, che ju mangjarin. Daspò si cjapà sù e i lè daûrji a Elie sicu so famei.
Peraule di Diu.

SALM RESPONSORIÂL dal Salm 15

R. Tu sês tu, Signôr, l'unic ben che o ai.

Ten cont di me, Diu, parcè che li di te mi pari.

I ài dit al Signôr: «Tu sês tu il gno Signôr,
parsore di te nissun altri ben no 'nd ài».

Signôr, part de mê ereditât e gno cjaliç,
tes tôs mans il gno destin tu strenzis. **R.**

O benedissarai il Signôr che mi à dade sapience,
ancje vie pe gnot il gno cûr mi inscuele.

Il Signôr al è simpri denant dai miei vôi;
se si met a la mê diestre, no cloparai. **R.**

Par chel il gno cûr al è content e al gjolt dentri vie,
parfin la mê cjar e polse sigure.

Parcè che no tu i darâs a lis inferis la mê anime,
no tu lassarâs che il to amì al ledi a finîle te tombe. **R.**

Tu mi fasarâs cognossi il troi de vite:
denant di te gjonde fin parsore il cjâf,
ligrie cence fin a la tô diestre. **R.**

SECONDE LETURE Ga 5,1.13-18

O sês stâts clamâts a la libertât.

De letare di san Pauli apuestul ai Galazians

Fradis, Crist nus à sfrancjâts pe libertât: tignît dût alore e no stait a lassâsi tornâ a meti sot dal jôf de sotanance.

Vualtris duncje, fradis, o sês stâts clamâts a la libertât. Dome che no vês di doprâ la libertât come un rimpin par vivi seont la cjar; invezit midiant dal amôr viodêt di jessi simpri ognidun famei di chel altri. Parcè che la leç e à la colme intune peraule sole, ven a stâi: “Tu amarâs il to prossim come te in persone”. Se dopo si muardês e si glotês un cul altri, cirît almancul di no fiscâsi fra di vualtris! Par chel us dîs: cjaminait cu la virtût dal Spirt e alore no larês daûr des vois de cjar. Di fat la cjar e à vois contrariis a chês dal Spirt, come che il Spirt lis à contrariis a chês de cjar. Di fat chestis dôs robis a son juste une cuintri di chês altre, di mût che vualtris no fasês plui ce che o volaressis. Ma se o sês sburtâts dal Spirt, no sês plui sot de leç.
Peraule di Diu.

CJANT AL VANZELI cf. Zn 8,12

R. Aleluia, aleluia.

Jo o soi la lûs dal mont, al dîs il Signôr,
chel che al ven daûr di me al varà la lûs de vite.

R. Aleluia.

VANZELI Lc 9,51-62

Si invià rissolût viers di Jerusalem. Ti vignarai daûr pardut là che tu larâs.

Dal vanzeli seont Luche

Biel che al stave par colmâsi il timp che al sarès stât puartât vie dal mont, Jesù si invià rissolût viers di Jerusalem e al mandà un pôcs di mes denant di se. Chei a partirin e a jentrarin tun borc di Samaritans, par prontâi ce che i coventave. Ma lôr no i faserin un bon acet parcè che al stave lant viers Jerusalem. Viodint une tâl, i dissepui Jacum e Zuan i diserin a Jesù: «Signôr, vuelistu che o disìn che al vegni jù il fûc dal cîl a parâju in cinise?». Ma Jesù si voltà viers di lôr e ur cridà. Po si inviarin par un altri borc.

Biel cjaminant, un i disè a Jesù: «Ti vignarai daûr pardut là che tu larâs». Ma Jesù i rispuindè: «Lis bolps a àn une tane e i ucei a àn un nît, ma il Fi dal om nol à dulà poiâ il cjâf». Po i disè a di un altri: «Ven daûr di me!». Ma chel i rispuindè: «Signôr, lassimi prime lâ a soterâ gno pari». Jesù i rispuindè: «Lasse che i muarts a soterin i lôr muarts; tu va a predicjâ il ream di Diu».

Un altri i disè: «Signôr, o vignarai daûrti; prime però lassimi lâ a saludâ i miei di cjase». I rispuindè Jesù: «Chel che al met man a la vuarzine e po si volte indaûr, nol è fat pal ream di Diu».

Peraule dal Signôr.

Su lis ufiertis

Diu, che tu operis cun fuarce intai tiei misteris,
fâs, par plasê,
che la nestre devozion e sedi simpri degne dai tiei sants regâi.
Par Crist nestri Signôr.

Antifone a la comunion Sal 102,1

Benedis, anime mê, il Signôr:
dut ce che al è in me il so non sant al benedissi.

Daspò de comunion

Cheste vitime divine ufierte e ricevude
che nus fasi vivi, Signôr,
par che, saldâts daprûf di te cuntun amôr che nol cognòs polse,
o podedin produci un ben che al dure par simpri.
Par Crist nestri Signôr.